



Sapadu prima die de lampadas si chistionat de Micheli Culumbu in Ollolai

de Tonino BUSSU


Puru in Ollolai si festat sa Die de sa Sardigna faveddande de sos fatos capitaos a sa fine de su '700 e de su fizu prus nodiu e famau pro sa vidda: Micheli Culumbu, sindicu, deputau italianu e europeu, iscritore da valia.

S'associatzione de Ollolai Divergentzias, cun s'azudu de s'assessorau regionale a sa istrutzione pùblica, in virtude de sa leze regionale n.44 de su 1993, at pessau de dedicare un'atopu pro faveddare de sa sarda rivoltuzione de sa fine de su '700 tratande de sa prova chi ant fatu sos frantzesos de occupare sa Sardignain su 1793, de sa rebellia de su 28 aprile 1794 bulliandeches a foras de Sardigna sos pieontesos e de sas lotas de Giomaria Angioy pro cumbatere su feudalesimu.

A pustis sos saludos de su sindicu de Ollolai Marco Culumbu e de s'assessore cumonale a sa cultura Frantziscu Barone, s'at a chistionare de Micheli Culumbu illustrande s'opera sua siat comente politicu e siat comente iscritore.

Difatis mentres prima b'ant a èssere lettras de sos pitzinnos de s'iscola media pro sa sarda rivoltuzione, a pustis ant a comintzare sas relatziones de Tonino Bussu e Frantziscu Casula.

Tonino Bussu at a trattare de Micheli Culumbu comente politicu, de sa casione chi fit sindicu de Ollolai, de sa marcia pro sa rinaschida dae Casteddu a Ollolai e a Tàtari in su 1965, de su impignu suo in su partidu sardu, siat



comente segretariu e siat comente presidente, e in sa camera de sos deputaos e in su parlamentu europeu.

Frantziscu Casula at treatare de Micheli Culumbu comente iscritore, de sas operas suas, 'L'Aurora è lontana' e 'Senza un perchè', de sos iscritos giornalisticos e de sa batalla pro sa limba e s'identidade de sa Sardigna.

Custu est su primu impignu chi in Ollolai s'at a fàghere pro onorare sa frigura de Micheli Culumbu chi est mortu in su mese de trivulas de su 2012.

(29-05-2013)